



陸士龍文集卷第一

晉清河內史陸

雲

士龍



賦箴

逸民賦

逸民箴

歲暮賦

愁霖賦

喜霽賦

登臺賦

南征賦

寒蟬賦

逸民賦 并序

富與貴人之所欲也而古之逸民或輕天下細萬物而欲專一丘之歡擅一壑之美豈不以身

聖於宇宙而恬貴於紛華者哉故天地不易其
樂萬物不干其心然後可以妙有生之極享無
疆之休也乃爲賦云世有逸民兮栖遲乎於一
丘委天刑之外心兮淡浩然其何求陋此世之
險隘兮又安足以盤遊杖短策而遂往兮乃枕
石而漱流載營抱魄懷元執一傲物思寧妙世
自逸靜芬響於永言滅絕景於無質相荒土而
卜居度山河而考室曾丘翳莽穹谷重深叢木
振穎葛藟垂陰潛魚泳沚嚶鳥來吟仍疏圃於
芝薄兮即蘭堂於芳林靡炎飈以赴節兮揮天

籟而興音假樂器於神造兮詠幽人於鳴琴挹
迴源於別沼兮食秋菊於高岑蒙玉泉以濯髮
兮臨濬谷而投簪寂然尸居儼焉山立遵渚龍
見在林鳳戢遁綿野以宅心望空巖而凱入明
發悟歌有懷在昔賓濶水之清淵兮儀磻溪之
一壑毒萬物之諛譁兮聊漁釣於此澤爾乃薄
言容與式宴盤桓朝挹芳露夕玩幽蘭眇區外
而放志兮眷天路而怡顏望靈嶽之清景兮想
佳人於雲端悲滄浪之濁波兮詠芳池之清瀾
鄙終南之辱節兮躋伯陽之考槃眄清霄以寄

傲兮泝凌風而頽歎玄微載晏何思何欲漂若
行雲之浮泊若窮林之木咨有得之必喪兮蓋
居龐之名辱彼貪夫之死權兮固遺生以要祿
竦戰兢而履冰兮秣肅懷以臨谷亮據鼎之無
慄兮在顛沛其必渥是故夫形魂者徵咎體壯
者爲犧雖明文而龍藻兮終俛首而受羈立修
名於禍始兮登全生於戾階資朝華之促節兮
抱千載之長懷擠考終於遠期兮顛靈根而自
摧殉有喪之假樂亦無身其孰哀美達人之玄
覽兮邈藏器於無爲物有自遺道無不可萬殊

有同齊物無寡並家於國等朝于野榮在此而
貴身兮神居形而忘我欽妙古之達言兮信懷
莊而悅賈憎旣明於天爵兮何愒於人禍陋國
風之皇恤同明哲於大雅亂曰乘白駒兮皎皎
遊穹谷兮藹藹尋峻路兮崢嶸臨芳水兮悠齋
槃丘園兮暇豫翳翠葉兮重蓋瞻洪崖兮清輝
紛容與兮雲際欲凌霄兮從之恨穹天兮未泰
詠歡友兮清唱和爾音兮此世

逸民箴

余昔爲逸民賦大將軍掾何道彥大府之俊才

也作反逸民賦盛稱官人之美寵祿之華靡偉
名位之大寶斐然其可觀也夫名者實之賓位
者物之寄窮高有必顛之舛溢美有大惡之尤
可不慎哉故爲逸民箴以戒反正焉

浩浩太素制爲兩儀經始君臣朝有俊弼野有
逸民各有攸屆而後品物有倫在昔后帝齊物
達觀賞不假爵教不示勸號謚莫設而生黎淳
晏降迄中古黃象可觀而唐文有煥乃彫乃藻
大樸旣散樸之旣散萬百熙心形爲寵放神爲
利淫有翹者車命彼在林是故懷玉喪寶而被

褐解襟恬亡智生與世或兢匪智無鑒匪心伊
鏡芒芒禹迹鞠爲塗徑惟是每懷偏彼反正正
反於寵旣尸干祿相協厥居而豐其屋祿之旣
尸刑爲爾司屋之旣豐喪家于宮故非據之災
戒之在凶人皆知存之爲存而莫知得之爲喪
榮猶振穎墜若頽荒咎自專寵福在循牆是故
保其安者常危而忘其存者不亡無休爾榮身
寔親名無謂爾崇神期好冲戒彼覆餗冒此棟
隆慎微如顯乃保身以終自古在昔逸民有作
相彼宇宙方之委舄夫豈無不休而好是冲漠

是故名利之災至人攸恪謂予未信無寧監于
桑霍天明既畏神道無親善在求已慶由積仁
無念爾本聿修厥淳執盈如虛乃反天真逸民
司正敢告官人

歲暮賦并序

余祇役京邑載離永久永寧二年春忝寵北郡
其夏又轉大將軍右司馬於鄴都自去故鄉荏
苒六年惟姑與姊仍見背棄銜痛萬里哀恩傷
毒而日月逝速歲聿云暮感萬物之既改瞻天
地而傷懷乃作賦以言情焉

夫何乾行之變通兮昏明迭而載路美飛轡之
遠御兮騰六龍於天步時赴節而漸流兮氣移
數而改度揮促節於短日兮振修策於長夜運
攸忽其既周兮歲冉冉而告暮變棘心之柔風
兮滋萋草之湛露玄暉邈以峻服兮黃裳皓而
振素於是顓頊御時玄冥統官天廟既底日月
貞觀淪重陽於潛戶兮嚴徵積陰於司寒日回
天以減景兮飈衝淵而無瀾堅冰涸於川底兮
白雪墮於雲端普區宇之瘁景兮頻萬物之衰
顏時稟戾其可悲兮氣蕭索而傷心淒風愴其

鳴條兮落葉翻而灑林獸藏丘而絕迹兮鳥攀
木而栖音山振枯於曾嶺兮民懷慘於重襟寒
與暑其代謝兮年冉冉其將老豈顏曄而朝兮
玄髮粲其夕皓感芳華之志學兮悲時暮而難
考遠圖逝而辭懷兮密思集而盈抱羨厚德之
溥載兮嘉彗化之大造恨盛來之苦晏兮悲衰
至之常蚤指晞露而怵心兮衍死生於靡草蒙
時來之嘉運兮遊上京而凱入委乘輅於紫宮
兮剖金虎而底邑憑台光之發暉兮荷寵靈而
來集望故疇之迥遼兮沂南風而頽泣長難息

而永懷兮感逝物而傷悲哀年歲之攸徃兮伊
行人之思歸結隆思於朝日兮綴永念於紀暉
表寸陰而貞吝兮盼盈尺其若遺嗟我行之久
永兮何歸途之茫茫憇遵渚於川盼攸逝兮江
湘處孝敬於神丘兮結祗慕於帷桑瞻山川而
物存兮思六親而人亡問仁姑而背世兮及伯
姊而淪喪尋餘蹤於空宇兮想絕景於遺堂悲
山林之杳藹兮痛華構之丘荒靖深情遐慕兮
思纏綿而懷楚涕垂頤以交頽兮哀凌心而洞
駭神尋路而窘逝兮形頻蹙乎其所心悠悠其

若懸兮音既絕而復舉悲人生之有終兮何天
造而罔極仰悲谷之方中兮顧懸車而日具百
年迅於分噓兮千歲疾於一息詠大椿之萬祀
兮同蟪蛄於未識歲難停而易逝兮情艱多而
秦寡年有來而棄子兮時無算而非我祗生心
於日順兮雖呼翕其難假攝僣生於逆旅兮欲
淹留其焉可彼鑒寐之有時兮亦始卒之固然
舒遠懷於千載兮悵同感乎中山鑒通人之炯
戒兮懼晏平之達言啓貞心以自買兮覽遺籍
而問道亮爽鳩之既徂兮故營丘之有紹在吾

儕之陋心兮豈取樂於東表苟長生而自得兮
將奚待而有天考大德於天地兮知斯言之益
矯

愁霖賦

永寧三年夏六月鄴都大霖旬有奇日稼穡沉
湮生民愁瘁時文雅之士煥然並作同僚見命
乃作賦曰在朱明之季月兮反極陽於重陰與
介丘之膚寸兮墜崩雲而洪沉谷風扇而攸遂
兮苦雨播而成滛天決漭以懷慘兮民嘖蹙而
愁霖於是天地發揮陰陽交烈萬物混而同波

兮玄黃浩其無質雷憑虛以振庭兮電凌牖而
輝室雷鼎沸以駿奔兮潦風驅而兢疾豈南山
之暴濟兮將冥海之蹇溢隱隱填填若降自天
高岸渙其無岷兮平原蕩而爲淵遵渚回於凌
河兮黍稷什於中田匱多稼於億庾兮虛夙敬
於祈年外薄郊甸內荒都城陰無晞景雷無輟
聲纖波靡於前途兮微律隔於峻庭紛雲擾而
霧塞兮漫天頽而地盈於是愁音比屋歎發屢
省陽堂乏暉朗室無景望曾雲之萬仞兮想白
日之寸脛感虛無而思深兮對寂寞而言靖毒

甚雨之未晞兮悲夏日之方永瞻大辰以頽息
兮仰天衢而引領愁情沉疾明發哀吟永言有
懷感物傷心結南枝之舊思兮詠在鳥之遺音
羨弁彼之歸飛兮寄予思乎江陰渺天末以流
目兮涕潺湲而沾襟何人生之倏忽痛存亡之
無期方千歲於天壤兮吾固已陋夫靈龜矧百
年之促節兮又莫登乎期頤哀戚容之易感兮
悲懽顏之難怡考傷懷於衆苦兮愁豈霖之足
悲雲曇曇而疊結之兮雨淫淫而未散晞朱陽
於崇朝兮悲此日之屢晏効豐隆於岳陽兮執

赤松於神館命雲師以藏用兮繼乘龍於河漢
照濛汜之清暉兮炳扶桑之始旦考幽明於人
神兮妙萬物以達觀

喜霽賦

余既作愁霖賦雨亦霽昔魏之文士又作喜霽
賦聊厠作者之末而作是賦焉

毒霖雨之掩時兮情懷憤而無懌肅有禱於人
謀兮反極陰于天律靖屏翳之洪隧兮戢大山
之觸石凌風絕而謐寧兮歸雲反而揮霍改望
舒之離畢兮曜六龍於紫閣揚天步之剡剡兮

播靈輝之赫奕於是朱明自皓凱風來南復火
正之舊司兮黜后土於重陰夷中原之多潦兮
反高岸於嵩岑萎禾竦而振穎兮偃木豎而成
林嘉大田之未墜兮幸神祇之有歆爾乃俯順
習坎仰熾重離兼明暢而天地擘兮羣生悅而
萬物齊魚凌淵以增躍兮鳥林而朝躋戢流
波於枉水兮起芳塵於沉泥朱光播於甕牖兮
素景衍乎中閨天監作照幽明畢覲普厥有懽
覃及四國翕萬情而成喜兮雖無獲而自得災
未及周和斯有祥翼翼黍稷油油稻糧望有年

於自古兮晞隆周之萬箱原思悅於蓬戶兮孤
竹欣於首陽陰陽交泰萬物方適炎神送暑素
靈迎秋四時逝而代謝兮大火忽其西流年冉
冉其易頽兮時靡靡而難留嗟沉哀之愁思兮
瞻日月而增憂感年華之行暮兮思乘煙而遠
遊命海若以量津兮吾欲往乎瀛洲臨儀天之
大川兮凌懷山之洪波瞻增城之峻極兮仰蓬
萊之峩峩望王母於弱水兮詠白雲之清歌雖
嘉命之未錫兮將輕舉於流沙振仙車之鳴鸞
兮吐玉衡之八和託芝蓋之後乘兮滄瓊林之

朝華修無窮以容與兮豈萬載之足多

登臺賦

永寧中參大府之佐於鄴都以時事巡行鄴官
三臺登高有感因以言崇替廼作賦云

承后皇之嘉惠兮翼聖宰之威靈肅言而述業
兮乃啓行乎北京巡華室以周流兮登崇臺而
上征攀凌坻而遂躋兮迄雲閣而少寧爾乃佇
眄瑤軒滿目綺寮中原方華綠葉振翹嘉生民
之疊疊兮望天啓之苕苕歷玉階而容與兮
蘭堂以逍遙蒙紫庭之芳塵兮駭洞房之迴飈

頽嚮逝而迁物兮傾冠舉而凌霄曲房榮而窈
眇兮長廊邈而蕭條於是迥路季夷邃宇玄芒
深堂百室曾臺千房闢南牕而蒙暑兮啓朔牖
而履霜遊陽堂而冬溫兮步陰房而夏涼萬禽
委虵於潛室兮驚鳳矯翼而來翔紛譎譎於有
象兮邈攸忽而無方于時南征司火朱明鬱遂
縣車式徐曜靈西墜暑乘陰而增炎兮景望淵
而曖昧玩宇而情歎兮覽八方而思銳陋雨館
之常規兮鄙鳴鵠之蔽第仰凌眇於天庭兮俛
旁觀乎萬類北溟浩以揚波兮青林煥其興蔚

扶桑細於毫末兮崑崙卑乎覆篲於是忽焉俛
仰面天地既必宇宙同區萬物爲一原千變之
常鈞兮齊億載於今日彼區中之側陋兮非吾
黨之一室本達觀於無形兮今何求而有質於
是聊樂近遊薄言僂佯朝登金虎夕步文昌綺
䟽列於東序朱戶立乎西廂經蕤擘以披藻兮
椒塗馥而遺芳感舊物之咸存兮悲昔人之云
亡憑虛檻而遠想兮審歷命於斯堂於是精疲
遊倦白日藏輝鄙春登之有情兮惡荆臺之志
歸聊弭節而駕言兮悵將逝而徘徊感崇替之

靡常兮悟廢興而永懷隆期啓而雲升逝運靡
其如頽長發惟祥天鑒在晉肅有命而龍飛兮
跚重斯而肇建嘉有魏之欽若兮鑒靈符而告
禪清文昌之離宮兮虛紫微而爲獻委普天之
光宅兮質率土之黎彥欽哉曩之承天集北顧
於乃眷誕洪祚之遠期兮則斯年於有萬

南征賦 并序

太安二年秋八月奸臣羊玄之皇甫商敢行稱
亂逼乘輿天子蒙塵于外自秋徂冬大將軍
敷命群后同恤社稷乃身統三軍以謀國難自

義聲所及四海之內朔漠之表蒸徒羸糧而請
奮胡馬擬塞而思征四方之會衆以百萬軍旅
之盛威靈之著自古已來未之有也粵十月軍
次于朝歌講武洽戎以觀兵于殷墟於是美義
征之舉壯師徒之盛乃作南征賦以揚匡霸之
勲云爾

有皇晉之霸后資濟哲之獻聖崇文德於緝熙
濟武功而保定應天鑒之昭華荷帝祐之休命
步玉衡以觀八方在旋璣而齊七政芒芒神道
化洽崇深印戾天飛俯洞淵沉振南箕以鼓物

冒慶雲而崇蔭■天維以籠世廓宇宙而宅心
濟博施之厚德鏗希聲之大音淵澤田而泣注
豪彥萃而爲林九服惟清諸夏謐靜肅慎回首
沙漠引領天和時降地靈夙挺結芳林之奇幹
■珍禾之神穎勵修德於億兆端澄形於萬景
在中葉之不兢遭皇家之毒亂悲國步之未夷
仰夙興而昧旦括無方而大誥集率土而貞觀
致天屬於王畿肅有征而省難爾乃建黃鉞之
靈威樹戎輅之高蓋伐隱天之雷鼓振凌霄之
電旆介天揮戈而夙興輕武撝千而啓萬振靈

韶之嘈嘈飛旛旌之藹藹虹旃沂風以委地霓
旄蒙光而容裔公徒十萬其會雲興悠悠華戎
時罔丕承爾乃命屏翳以夕降式飛廉以朝升
塗蒙雨而復清景帶天而光澄陪武臣於彫軒
列名僚於後乘猛將起而虎嘯商飈肅其來應
士憑威而嚮駭馬獻天而景凌臨川屯於廣陸
武騎被乎中陵類禡比京師徒經始栢栢先征
在河之涘順彼長道懸旌千里羨王師之遵時
茂七德而發止爾乃稅駕殷墟我徒旣閑順時
講武簿狩于原紛同方而類聚煥副翼而明分

祇明刑以誓衆習軍政於舊聞儼山立以崇蒼
粲煙駭而興紛若冥海之引回流岱靈之吐行
雲于時玄冬首時陰風戒煞山澤含哀天地肅
又閑夜冽以澄清中原曠而曖昧戎士肅而咸
戒三軍紛而雜選長角哀叫以命旅金鼓隱旬
而啓伐景凌冥而四播音乘雲而上逝火烈具
舉伐鼓淵淵朱光俛而丹野炎暉仰而絳天曜
靈翕赫以增熾憤氣拂悅而凌煙狂飈起而妄
駭行雲藹而千眠旌旆翻其猗靡驚慄因而嬾
娟爾乃洪音雷漬問剋廣凌雲發揮萬里振

響聲馮虛而天回烈駭而地蕩映皓月而望舒
闇照重昏而大夜朗服縣炎揚而晃儵飛烽戢
煜而決漭乃有熊羆之旅虓闕之將雄聲泉涌
逸氣風亮超三軍以奔厲賈餘勇而成壯地洪
音於寂漠先無形而高唱紛若屯雲渙若積波
遁陰景靜言勿譁絕倡寂其既收萬夫翕而
咸和嚴鼓隱而重戒景燧曄而星羅烈蒙陰而
叩假曜憑陽而登遐若扶桑之振華葉皓天之
散朝霞超燭龍之絕景豈比象於百華

寒蟬賦 并序

昔人稱鷄有五德而作者賦焉至於寒蟬才齊
其美獨未之思而莫斯述夫頭上有綏則其文
也含氣飲露則其清也黍稷不食則其廉也處
不巢居則其儉也應候守節即其信也加冠冕
取其容君子則其操可以事君可以立身豈非
至德之虫哉且攀木寒鳴貧才所空歎余昔僑
處切有感焉興賦云爾

伊寒蟬之感運近嘉時以遊征含二儀之和氣
稟乾元之清靈體貞精之淑質吐啾啞之哀聲
希慶雲以優遊遁太陰以自寧於是靈岳幽峻

長林參差爰蟬集止輕羽涉池清澈微激德音
孔嘉承南風以軒景附高松之二華黍稷惟馨
而匪享竦身希陽乎靈和咲乎其音翩乎其翔
容麗蜩蟪聲美宮商颺如飛焱之遺驚風眇如
輕雲之麗太陽華靈鳳之羽儀渚皇都乎上京
跨天路於萬里豈蒼蠅之尋常爾乃振修綏以
表首舒輕翅以迅朝華之墜露含煙熅以夕食
望北林以鸞飛集樛木以龍蟠彰淵信於巖時
稟清誠乎自然翩眇微妙綿蠻其形翔林附木
一枝不盈豈黃鳥之敢希唯鴻毛其猶輕憑綠

葉之餘光哀秋華之方零思鳳居以翹竦仰竚
立而哀鳴若夫歲聿云暮上天其涼感運悲聲
貧士含傷或歌我行永久或詠之子無裳原思
嘆於蓬室孤竹吟於首陽不銜子以穢身不勤
身以營巢志高於鳴鳩節妙乎鷓鴣附枯枝以
永處何瓊林之迥條惟雨雪之霏霏哀北風之
飄颻既乃彫以金采圖我嘉容珍景曜爛暉曄
華彗竒侔黼黻艷比袞龍清和明潔群動希蹤
爾乃綴以空冕增成首飾纓綈翩紛九流容翼
映華虫於朱袞表馨香乎明德於是公侯常伯

乃紆紫黻執龍淵俯鳴珮玉仰撫貂蟬衿黃廬
之多士光帝皇之待人既騰儀像於雲闈望景
曜乎通天邁休聲之五德豈鳴鷄之獨珍聊振
思於翰藻闕令問以長存於是貧居之士喟爾
相與而俱嘆曰寒蟬哀鳴其聲也悲四時云暮
臨河徘徊感北門之憂殷嘆卒歲之無衣望泰
清之巍巍我思希光而無階簡嘉蹤於皇心冠神
景乎紫微詠清風以慷慨發哀歌以慰懷

二俊文集以慶元六年二月既望書成縣學職事校正監刊者三真題名于後

縣學司訓進士朱奎監刊

縣學直學進士孫垓校正

縣學學長鄉進士范袞同校

陸士龍文集卷第二

晉清河內史陸雲士龍

詩

四言失題

征西大將軍京陵王公會射堂皇太子見命作一首

大將軍宴會被命作一首

大尉王公以九錫命大將軍讓公將還京邑祖餞贈一首

太安二年夏四月大將軍出祖王羊二公

於城南堂皇被命作一首

從事中郎張彥明爲中護軍一首

贈顧驃騎後二首

贈汲郡太守

四言失題

前八章
後六章

悠悠縣象昭回太素清濁迭興升降啓度遺和
既爽季春告暮朱明來思青陽受煦

其一

日征月盈天道變通大初陶物造化爲功四月
惟夏南征觀方凱風有集飄飄南窓思樂萬物

觀異知同

其二

有奄萋萋甘雨未播黍稷方華中田多稼庭槐
振藻園桃阿阿薄言觀物在堂知化

其三

蓬戶惟清玩物一室明發有懷念昔先哲通夢
幽人彷彿遺烈清暉在天孰與永日

其四

乃啓遺籍思予大觀幽居傲物顧景怡顏况惟
解舞衡門重關思媚古人有懷良盤沉曦含輝
芳烈如蘭

其五

厥初生民有物有類自古有稱大寶以位征徒
式好俊奔攸遂啓予有聞誨爾達貴

其六

詩貴伊何天爵無榮渾
大昧混其濁清毀方
遁象遺頑履貞道實藏器景以昭形

其七

芒芒陋世奚競奚錯牧彼紛華委之冲漠漂志
垂天矯心馮閣通好莊聃儀形有作安得達人
顧予命薄

其八

思樂芳林言采其蕝衡薄遵塗中原有菽登彼
修巒在林寤宿彷彿佳人清顏如玉

其一

予美亡比誰爲適道容與俟之玄髮方皓躑躅
山阿玩此芳草願食其穎庶以遺老

其二

疊疊嘉時飄忽棄予有瞻逝深永嘆潛澣登願
扶桑仰結飛晷伊人匪存遺芳孰與

其三

精氣爲物或降或升徂落攸往神奇有登死生
爲徒存亡曷勝謂予不信遺藉有徵

閒居外物靜言樂幽繩樞增結甕牖綢繆和神
當春清節爲秋天地則爾戶庭已悠

其四

嗟我懷人悠悠其潛念昔先烈有懷所欽駭情
玩世堂允南金瓊輝邈矣誰適爲心明發興言
忼慨芳林

其六

征西大將軍京陵王公會射堂皇太子
見命作此詩

芒芒大極玄化烟煜頽形成器凌象垂文大鈞

造物庶類群分先識經始實綜彝倫

其一

惟岳隆周生甫及申天監在晉杵之降神邈矣
遐風茂德有隣永言配命唯晉之鎮

其二

厥鎮伊何實幹心齊文教內輔武功外禦淮方
未靖帝曰攸序公于出征奄有南浦

其三

南海旣賓爰戢干戈桃林釋駕天馬婆娑象齒
南金來格皇家絕音協徽宇宙告和

其四

玄綱峻極天罔旣紘文武方升允茲兼弘峩峩
高夏有肅其涼公侯戾止駉驥龍驤善問如林
在會鏘鏘祝融銜節火正緝熙凱風徘徊萬物
欣時秩秩初筵薄言在茲嘉福介祐萬壽無期

其六

大將軍宴會被命作此詩

皇皇帝祐誕隆駿命四祖正家天祿保定叡哲
惟晉世有明聖如彼日月萬景攸正

其一

巍巍明聖道隆自天則分明喪觀象洞玄凌風
叶極絕輝照淵肅雍徃播福祿來臻

其二

在晉軒臣稱亂紫微神風潛駭有赫茲威靈旗
樹旆如電斯揮致天之屆于河之沂有命再集
皇輿凱歸

其三

頽綱旣振品物咸秩神道見素遺華反質辰畧
重光協風應律函夏無塵海外有謚

其四

芒芒宇宙天地交泰王在華堂式宴嘉會玄輝

峻朗翠華崇，藹冕弁振纓。藻服垂纓帶。

其五

祁祁臣僚有來雍，雍薄言載考承顏。下風覲
嘉客仰瞻玉容施，已唯約于禮斯。豈天錫難老
如岳之崇。

其六

太尉王公以九錫命大將軍讓公將
還京邑，祖餞贈此詩。

列文辟公時，惟哲王闡縱絕期。平顯幽光內，實
慎徽緝熙。有臧出紕方，懸間督不揚。高山峻極。

天造茫茫

其一

天子念功大典光，備肅肅王命宰臣莅事穆矣。
淵讓遺功遂志思，我遠猷徽音孰嗣。

其二

后命既靈，王人反旆。興言出祖，飲餞于邁。旌旒
泱泱，輶軒藹藹。和風弭塵，清暉映蓋。

其三

思樂中陵，言觀其川。公王戾止，有車麟麟。伊誰
云饗，我有嘉賓。羽觴舉酬，酢爾征人。

其四

悠悠征人四牡駢駢發軫北京振榮紫微昔乃
云來春林方輝歲亦暮止之子言歸道途興戀
伏載稱

其五

聖澤旣渥嘉會悃悃庭旅鍾鼓堂有瑟琴飛轡
清暉扶桑移蔭飄祗慕揮袂沾襟變彼同栖悲
爾異林我有旨酒以歌以吟

其六

大安二年夏四月大將軍出祖王羊二

公於城南堂皇被命作此詩

時文唯晉天祚有祥聖宰作弼受言旣威有赫
斯庸勲格昊蒼景物台暉棟隆玉堂

其一

惟常思庸大興光迪聖敬遠濟神道玄邈思媚
三靈誕膺天篤嘉命旣辱王人言告

其二

翼翼主人言告惟慕公輿駕言乃眷斯顧華旂
飛藻鳴鸞振路駢駢駟牡噓天載步

其三

我有高夏如雲斯蒼會彫軒戾止薄言嘉會問誰
在宴惟俊惟乂豈俎殷薦獻酬交泰

其四

攸攸昊天南正興言朱明有暉萬葉翠繁昌雲
垂天凱風熙顏王臣在此貽宴于權

其五

懸象西頽虞淵納景嘉樂未晞
駕已整行矣
征人身垂路永飛驂顧懷華蟬引領遺思北京
結轡臺省

其六

贈顧驃騎後二首

有皇美祈陽也祈陽秉文之士駿發其聲故能
明照有吳入顯乎晉國人美之故作是詩焉
有皇大晉時文憲章規天有光矩地無疆神篤

斯祐本顯克昌載生之雋實惟祈陽哲問宣猷
考茂其相

其一

於鑠祈陽誕鍾天篤清輝龍見玄猷淵嘿沉機
響駭幽神廣覲和以同人歸物時育有大惡盈
謙以自牧思我懿範萬民來服

其二

吳未喪師天秩有庸淵哉若人弱冠休風俯翼
黃門以德來忠端秀蕃后正色儲宮徵音鑠穎
逸矣遐踪

其三

皇維南終舊邦匪歆委弁釋位如龍之潛考槃
穹谷假樂豈林子雖藏器鍾鼓有音惠風往敬

慶問來尋

其四

濟濟元公相惟天子明明辟王思隆多士帝曰
欽哉有命集止我咨四方令問在爾以朕大賚
乃膺嘉祉聿來胥步觀國之紀

其五

惟皇建極緝熙清曜我有峻民明德來照大觀
在上主假有廟顯允顧生金聲玉振之于于升
利見大人龍輝絕跡有肅清塵

其六

清塵既彰朝虛好爵敬子侯度慎微百辟予聞
有命德禮不易嗟我懷人瞻言永錫彗祐東法
惟子之績

其七

遵泫涉泗言告同征勁風宵烈湛露朝零雲垂
藹下泉冽清冷哀哉行人感物傷情從子京邑
言觀厥成天保祚德式穀以寧

其八

思文美祁陽也祈陽能明其德刑于寡妻以至
于家邦無思不服亦賴賢妃貞女以成其內教
故作是詩焉

思文祁陽祁陽克峻天錫淳嘏宣茲義問德音
既烈海外有奮既奮斯音祇敬厥德照治其家
覃及邦國永肇儀刑俾民惟則

其一

文王在上大妣思齊魯侯克昌亦賴令妻鑒神

有顧蘋繁在斯祁陽載天作之伉儷

其二

在虞之胄實惟有姚穎艷玉秀華茂桃夭居顯
祇明在靈格幽清塵熠爍淑心綢繆爰及祁陽
惟德之周

其三

其德伊何和貞虔告師民履素言謀慮度鐘鼓
思樂靖端夙效考休攸嬪來嫁于顧

其四

羔羊執贄玉帛有輝百兩集止之子于歸宗姻
風從娣姪雲回祁陽顧之煥其盈闈

其五

既日歸止式揚好音言觀河洲有集于林思樂
葛藟薄采其蕈疾皮攸遂乃孚惠心

其六

惠心既孚有恪中饋敦此衆斯永錫嗣類載延
窈窕用和寤寐神之聽之胤祚來爾

其七

昔周之隆有妣如有內刑聖敬外崇多士今我
淑人實亮君子疊疊翼翼亦繼斯祉宜爾子孫
福祿盈止

其八

從事中郎張彥明為中護軍并叙

奚世都為汲郡太守客將之官大將軍崇賢之
恩既遠而厚下之恩又隆非此離析有感聖皇
之蒙引見又宴于後園感鹿鳴之宴樂詠魚藻
之凱歌而作是詩

思文有聖叡哲配天功濟生黎道合上玄休命
發揮有集惟賢哲彼宿澄此在淵

其一

濟濟多士實播令聞
孔碩惠爾風雲穆此
烈肇揚清芬
曰欽哉余嘉乃勲徽音

其二

肅肅庶僚衽服寵暉肇被桃虫假翼翻飛出撫
邦家入翔紫微有命既集願言永違

其三

思樂華堂雲構崇基公王有酒薄言饗之景曜
徽芒芳風詠時宴爾賓儉具樂于茲

其四

疊疊我王豐恩允藏我客戾止飲酒公堂自彼
下僚聿來有光悲矣永言指塗逝將形違殿闥
景附華房

其五

開國承家勿用小人今我聖宰實蕃斯仁凌淵
龍躍披林鳳振正直既好嘉禮陳振我遠德
歸于時民

其六

贈汲郡太守

於穆皇晉豪彥實蕃天罔振維有聖貞觀鳴鳥
在林良駿即閑萃俊又時亮庶官

其一

抑抑奚生天篤其淳芳穎蘭揮瓊光玉振沉機
照物妙思考神思我善問觀德古人

其二

善問伊何惠音孔韶肇允衡門翻飛宰朝肅雍
芳林芬響凌霄穆矣和風育爾清休

其三

亦既有試出宰邦家之子于行民固謳歌風澄
俗儉化靜世波芒芒既庶且樂于和

其四

我有好爵既成爾服入贊崇華遂登帷幄時文
聖宰天祚方穀朔風微止鴻漸雲嶽

其五

悠悠斯民三代直道我求明德惟奚攸考緝熙

暉章天祿來保惠心無兢豐化有造

其六

樂只君子茂德攸綏嗟我懷人式是言歸聿言
來集如翼斯揮日予不惠照爾清暉

其七

職思既殊亦各有司念我同僚悲爾異事之子
之遠悠悠我思雖無贈之歌以言志

其八

陸士龍集卷第二

陸士龍文集卷第三

晉清河內史陸雲士龍

詩

兄平原贈 贈鄭曼季往返八首

贈顧尚書一首

贈顧彥先一首

答顧秀才一首

答大將軍祭酒顧令文一首

答吳王上將軍顧處微一首

贈鄱陽府張仲鷹一首

孫顯世贈并荅 失題二首

兄平原贈 并序

余弱年夙孤與弟士龍銜卹喪庭續會逼王命
墨經即戎時並縈髮悼心告別漸歷八載家邦
顛覆凡厥同生彫落殆半收迹之日感物興哀
而龍又先在四時迫當祖載二昆不容逍遙銜
痛東徂遺情西暮故作是詩以寄其哀苦焉
於穆予宗稟精東嶽誕育祖考造我南國南國
克靖實繇洪績惟帝念功載繁其錫其錫惟何
玄冕衮衣金石假樂旄鉞授威匪威是信稱平

遠德奕世台衡扶帝紫極

其一

駕生三昆克明克俊遵塗結轍承風襲問帝曰
欽哉纂戎裂祚雙組式帶綬章載路即命荆楚
對揚休顧肇敏厥績武功聿舉煙煴芳素綢繆
江滸昊天不吊胡寧棄予

其二

嗟予人斯胡德之微闕彼遺軌則此頑違王事
匪監旄旆屢振委籍舊戈統厥征人祈祈征人
載肅載閑駸駸戎馬有 有翰昔予翼考惟斯
伊撫今予小子繆尋末緒

其三

有命自天崇替靡常王師乘運席江卷湘雖

守守從武臣守局下列譬彼飛塵洪波雷擊
與衆同泯巔跋西夏收迹舊京俯慙堂構仰懷
先靈孰云忍媿寄之我情

其四

伊我俊弟咨爾士龍懷襲瑰瑋播殖清風非德
莫勲非道莫弘垂翼東畿耀穎名邦綿綿洪統
非爾孰崇依依同生恩篤情結義存並濟胡樂
之悅願爾偕老携手黃髮

其五

昔我西征扼腕川湄掩涕即路耀袂長辭六龍
促節逝不我待自往迄茲曠年八祀悠悠我思
非爾焉在昔並垂髮今也將老銜哀茹感契闊

充飽嗟我人斯胡卹之早

其六

天步多艱性命難誓常懼墮孤魂殊裔存不
阜物沒不增壤生若朝風死猶絕景視彼浮遊
方之僑客眷此黃廬譬之斃它匪身是矣亮會
伊惜其惜伊何言紆其思其思伊何悲彼曠載

其七

出車戒塗言告言歸辱食驚駕夙興宵馳濛雨
之陰炤月之輝陸陵峻坂川越洪漪爰屆爰止
步彼高堂失爾羽邁良願中荒我心永懷匪悅
匪康

其八

昔我斯逝兄弟孔仁今我來思或彫或疚昔我
斯逝族有餘榮今我來思堂有哀聲我行其道
鞠爲茂草我履其房物存人亡拊膺涕泣血淚
彷徨

其九

企佇朔路言爾歸心存言宴目想容輝迫彼
窳窳載驅東路繼其桑梓肆力丘墓婉兮變兮
興懷罔極眷言顧之使我心惻

其十

答

伊我世族太極降精昔在上代軒虞篤生厥生
伊何流祚萬齡南嶽有神乃降厥靈誕鍾祖考

憂沒齒憂懷惟何顧景惟塵我我高蹤眇眇
辰明德繼體莫非哲人今我頑鄙規範靡遵仍
世載德荒之予身莫峻匪岳有俊斯登莫高匪
雲有高斯凌矧我成基匪克階升玄黃長坂載
寐載興豈敢憚行哀此負乘芒芒高山自予頽
之濟濟德義匪予懷之終銜永負于其媿而昔
予言曠汜舟東川銜憂告辭揮淚海濱羲陽趣
駕炎華電征自我不見邈哉八齡悠思迥望寤
言通靈昔我往矣辰在東嶠今我于茲日薄桑
榆銜艱邁愍困瘁殷憂哀矣我世匪蒙靈休開

元迄茲震興迭微弱風隱駭海水群飛王旅南
征闡耀靈威予昆乃播爰集朔土載離永久其
毒太苦上帝休命駕言其歸多我邁愍振蕩朔
垂羈繫殊俗初願用違嚴駕東征肅邁林野夕
秣乘馬朝整僕旅矯矯乘馬載驅載馳湯湯長
路或降或階晨風夙零朝不皇飢傾景儵墜夕
不存罷雖有豐草匪釋奔駟雖有重陰匪違假
寐煢煢僕夫悠悠造征經彼喬木有鳥嚶鳴微
物識儕矧伊有情樂茲棠棣實歡友生既至既
覲滯思曠年曠年殊
覲未浹辰恨其永懷憂

徹茲神明運步玉衡仰和太清賓御四門旁穆
紫庭紫庭旣穆威聲爰振厥振伊何播化殊鄰
清風攸被率土歸仁彤弧所彎萬里無塵功昭
王府帝庸厥勳黃鉞授征錫命頻繁闕如武虎
肅茲三軍光若辰跼亮彼公門仍世上司芳流
慶純雲和所產爰育二昆誕豐岐嶷夙邁令問
令問伊何休音允臧先公克構乃崇斯堂耀穎
上京發迹扶桑戎車山征時惟鷹揚鷹揚旣昭
勲庸克邁天子命我鎮弼于外在作扞城以表
南裔降災匪蠲景命顛沛惟我賢昆天姿秀生

含竒播殊明德惟馨太陽散氣乃稟厥和山川
垂度爰則厥遐厥遐伊何惟光惟大惟大伊何
如岱如渭恢此廣淵廓彼洪懿弘道惇德淵哉
爲器統我先基弱慷慨將弘祖業實崇奕世咨
予頑蒙蕞爾弱才沉耀玄渚挹庇雲淇陶化靡
移固陋于茲瞻仰洪範實忝先基巍巍先基重
規累構赫赫重光遐風激鷺昔我先公爰造斯
猷今我六蔽匪崇克扶悠悠大道載邈載遐洋
洋淵源如海如河昔我先公斯綱斯絕今我未
嗣乃傾乃圯世業之頹自予小子仰愧靈丘街

習習谷風其集惟高嗟我懷人於焉道遙鸞栖
高岡耳想雲韶拊翼墜夕和鳴興朝我之思之
言懷其休

其四

習習谷風其音孔嘉所謂伊人在谷之阿虎質
山嘯龍輝淵蟠維南有箕匪休其和有球斯畢
戢爾滂沱懿厥河漢惟彼大華明發有懷我勞
如何

其五

鄭荅

鶯鶯美賢也有賢者二人雙飛東岳揚輝上京
其兄已顯登得朝而弟中漸婆娑衡門然其勞

謙接士吐握待賢雖姬公之下白屋洙泗之養
三千無以過也乃肯垂顧惠我好音思樂結永
好之懽云爾

鴛鴦于飛在江之浹和音反暢拊翼雙起朝遊
蘭池夕宿蘭芷清風翕習扇彼蘭茝凌雲高厲
載翔載止

其一

鴛鴦于飛載飛載吟有鬱浚藪實惟桂林芳條
高茂華繁垂陰爰翔爰翔爰憩其南有馥清芬
協我好音

其二

鴛鴦于飛乘雲高翔有嚶其友戢翼未翔澹淡

心孔艱天地永久命世難長生民忽霍曷去其
常我之既存靡績靡紀乾坤難並寂焉其已生
若雷激沒若川征存愧松柏逝慙生靈匪吝性
命實悼徒生苟克折薪豈憚冥冥瞻企皇極徼

福上天冀我友生要期末年昔我先公邦國攸
興令我冢道綿綿莫承昔我昆弟如鸞如龍今
我友生凋俊隊雄家哲未徂世業長終革堂傾
構廣宅頽墉高門降衡修庭樹蓬感物悲懷滄
矣其傷惇仁泥愛錫予好音晞光懷寶煥若南
金披華玩藻華若翰林詠彼清聲被之瑟琴味
此殊響慰之予心弘懿忘鄙命之反覆敢投桃
李以報寶玉冀馮光蓋編諸末錄

贈鄭曼季往返八首

谷風懷思也君子在野愛而不見故作是詩言

其懷思之也

習習谷風扇此暮春玄澤墜潤靈爽煙焜高山
熾景喬木興繁蘭波清踴芳澍增涼感物興想
念我懷人

其一

習習谷風載穆其音流瑩鼓物清塵拂霖雨
嘉播有滄淒陰歸鴻逝矣玄鳥來吟嗟我懷人
其居樂潛明發有想如結予心

其二

習習谷風以溫以涼玄黃交泰品物含章潛介
淵躍候鳥雲翔嗟我懷人在津之梁明發有思
凌彼褰裳

其三

素波容與趨倡雖曰戢止和音遠揚我有好爵
與子偕嘗

其三

鴛鴦于飛徘徊翩翩載頡載頎命侶鳴群有鬱
蘭臯列彼清源駕言遊之聊樂我云思與佳人
齊懽順川

其四

鴛鴦于飛或飛或遊習習谷風扇彼清流春草
揚翹龜龜沉浮感物興想我心長憂誰謂河廣
曾不容舟企予望之搔首踟躕

其五

鴛鴦于飛載和其鳴懷爾好音寡我中情人亦
有言心得遺形授我木瓜報爾瑤瓊匪繫曰報

永好千齡

其六

陸贈

鳴鶴美君子也太平之世君子猶有退而窮居者樂天知命無憂無欲碩人之考樂傷有德之遺世故作是詩也

鳴鶴在陰戢其左翼肅雍和鳴在川之側假樂君子詐爾明德思樂重虛歸于其極嗟我懷人惟馨黍稷

其一

鳴鶴在陰其鳴喈喈垂翼蘭沼濯清芳池假樂君子其茂猗猗底之瑰寶有粲瓊環乃振裝裳

襲爾好衣嗟我懷人啓襟以晞

其二

鳴鶴在陰其儀藹藹謂天蓋高和音于邁假樂君子篤膺俊乂穆風潛烈興雲戢蓄德茂當年時衍嘉會安得盤藻改爾編帶嗟我懷人心焉忼悵

其三

鳴鶴在陰載好其聲漸陸儀羽遵渚回涇假樂君子柞之篤生德耀有穆如瑤如瓊安得風帆深濯鬢滅景遺雲雨爾在北冥嗟我懷人惟用傷情

其四

鄭荅

蘭林懽至好也有君子世濟其美英名光茂遭
時暫否福德衡門顧我慇懃屢辱德音思與結
好以永不刊

瞻彼蘭林有翹有秀有斐君子邦之碩茂厥德
伊何固天攸授如川之源如山之富回流清淵
啓襟開裕縉紳晞風民用胥附 其一

猗猗碩人如玉如金浚其明哲尅廣德心習習
凱風吹我棘林飛鴉萃至允懷好音悠悠征徒
輶德鮮任嗟我猗人和樂實忱 其二

在昔延州鵠鳴江涯今我陸子曠世繼竒身乖

千載德音並馳漸鴻遵渚宛其羽儀安得高風

騰翻天池

其三

飛龍蜿蜒山谷升氣猛虎嘯吟清風高厲情同
來感數乖身逝夷鮑齊懽專名故世愷悌君子
民之攸懃咨予遘時千載同愛 其四

垂龔之會匪詩不宣嗟我懷人斯恩斯勤德音
來訊有蔚其文菽菽懽兔匪迹不存誠在心德
愛結忘言 其五

陸贈

南衡美君子也言君子遯世不悶以德存身作

者思其以德來仕又願言就之宿感白駒之義
而作是詩焉

南衡惟岳峻極昊蒼瞻彼江湘惟水泱泱清和
有合俊乂以藏天保定爾茂以瓊光景秀濛汜
穎逸扶桑我之懷矣休音俊揚 其一

穆穆休音有來爾雍沉波涌奧淵芳馥風僚虛
養恬照日遺蹤考槃遵渚思樂潛龍我之懷矣
冥爾華宮 其二

和璧在山荆林玉潤之子于潛清輝遠振克稱
輔德作寶有晉和聲在林羽儀未變我之懷矣

有客來信

其三

風雲有作應通山淵清琴啓彈宮商乘絃類族
知感有命自天夷叔希世猶謂比肩矧我與子
姤會斯年 其四

我之懷矣在彼北林北林何有於煥斯文瓊瑰
非寶尺牘成珍豐華非妙得意惟神河魴登俎
遺荅清川 其五

鄭荅

南山酬至德也有退仕衡門修道以養和棄物
以存神民思其治士懷其德或思置之列位或

思從之信宿詩人嘉與此賢當年相遇又屢獲
德音情懽心至故作是詩焉

陟彼南山言采其蕭樂只君子邦家之翹克茂
厥猶輔德是收聊道以儉廣愛以周嗟我懷人
永好千秋

其一

瞻彼江潭言釣其鱖有美碩人自公退處羔裘
逍遙輔德是舉白駒遯時世事孰與思我猗人
寘之晉序有客信信獨寐寤語

其二

天高地卑玄黃煙熅人道交泰自昔先民耽文
合好輔德與仁管叔罕僑曠世難鄰修組施結

玄弁生塵咨我與子邁會當身琴瑟在御永愛
纏綿

其三

瞻彼江澳言詠其潭所謂伊人在水之陰養和
以泰樂道之潛錦衣尚綢至樂是耽興言永思
繫懷所欽愛而不見獨寐寤吟

其四

詩以言志先民是經乃惠嘉訊德音惟馨欽詠
繁藻未結中情華文傷實世士所營達人神化
反之混冥交棄其數言取其誠思與哲人獨寶
其貞

其五

陸贈

瞻彼高崗有猗其桐允也君子實實南江貞規
啓俗沉矩履方泳此明流清瀾川通陟彼衡林
味其回芳

其一

馥馥回芳網繆中原祁祁庶類薄采其芬拙遲
泌丘容與衡門聲播東汜響溢南雲

其二

穆穆閭闔南端啓籥度明以庸帝聽式闕有鳳
于潜在林栖翮非予之祚孰與好爵

其三

幽居玩物顧景自願發憤潛惟佶佛有思予美

忘此終然胥來企予與言惟用作詩

其四

鄭荅

瞻彼中陵蘭黃猗猗允矣君子樂且有儀沉仁
育物玄聰鏡機德充闔庭名逸南畿祁祁俊友
言酌言依

其一

鼓鍾于宮百里震聲尊壘令問歸我偉貞厥震
伊何駿奔以驚厥問伊何民胥以寧有鶴在陰
非子誰鳴我有好爵非子孰盈

其二

潛龍遁初有鳳戢暈王猶未泰彝倫錯違臯門

重
爾啓扉庶績適敷非爾焉綏翼翼京宇
俟爾攸晞民之胥望如渴如飢
其三

德音來惠覆玩三周沉潤淵洞逸藻雲浮結心
所親曷變曷渝路隔津梁一筆限殊終朝之思
三秋是踰愛而不見興言踟躕
其四

贈顧尚書

五嶽降神四瀆炳靈兩儀鈞陶參和大成兆光
人倫誕育至英於顯尚書實惟我兄行成世則
才爲時生體道既弘大德允明厥弘伊何靡曠
不遵厥明伊何靡妙不研無索炤灼有冰幽玄

細微不錯毫芒以陳積篲爲山納流成淵扶翹
布華養物作春所肅以禮所潤以仁宣質拔行
曜文入采堅不可鑽清如凝水方迹迎服蹈齊
闕里晞聖而惟亦顧之子彼棄芝英玩此蘭茝
異世同芳其馥不已我蘭旣馥我風載清能芬
南岳運芳北征子有其德人求其馨逝此陋巷
薰彼紫庭厥音不已鼓鍾有聲聞天之聰譬之
鵠鳴天聰旣招我實惟彰乘風之鳳眷言朝陽
披雲藻綉來此舊鄉謙光自抑厥輝愈揚麗容
雕翕孔好已張旣照平林且我華英華英已曜

餘先難延會淺別速哀以紹欣追曠同塗暫和
笑言殊音合奏曲異響連絕我懼條統我思因
根分來在愛感徃思我非形景有處有遊載離
載會且懼且憂感彼遠曠矣此延娛樂奏聲哀
言發涕流唯願我子德與福俱亦天之枯亦我
之

贈顧彥先

玄黃挺秀誕授至真行該其高德備其新光瑩
之偉階下同珍騰都之龍鳳合塵

其一

皇皇明哲應期繼聲華映殊域實鎮天庭入輔
出輔乾乾靡寧夏發涼臺我雨我暑冬違邦族
風霜是處嗟彼獨宿誰與晤語飄飄艱辛非禹
孰舉言念君子悵惟心楚

其二

悠悠山川驍驍征遐陟升嶽堯降涉洪波言無
不利乘嶮而嘉人懷思慮我保其和

其三

邂逅相遇良願乃從不逢知己誰濟予躬莫攀
莫附媿我高風時過年邁晡冉桑榆晞元賴潤
亦在斯須假我夷塗頓不忘驅汎子津川桴不

失浮無愛餘輝遂暗東隅

其四

幽幽東嶠戀彼西歸瞻儀情感聆音心悲之子
于邁夙夜京畿王事多難仲焉徘徊

其五

荅顧秀才

芒芒上玄有物有則厥初造命立我藝則爰茲
族類有覺先識斯文未喪誕育明德 其一
允矣顧生載靈之和沉根芳沼濯秀蘭波淵翹
戢穎景茂凌華惟是德心是用閑邪 其二
德心伊何行歸于周晞高仰峻企遠懷悠匪願
在明靡倦斯幽凡我同朋瞻言清休 其三

慎終于遠俾民歸厚言若有行及予携手何以
恤我其仁孔有心之云愛隆敬其久 其四
既邁斯仁亦迪茲文藻不雕樸華不變淳有斐
君子如珪如璠仰欽德類依懷惠詮式揚好問
邦家于宣 其五

荅大將軍祭酒顧令文

惟林有鸞惟淵有螭顯允明德實邦之基先后
陟恪子配于茲遵彼玉堂受言遘之 其一
中原有軌世鮮克蹈先民有懷子探其妙心猶
水鑒函景內照名若振炎攄光外耀 其二

相被水鑿民胥攸臨矧曰明德人誰弗欽寫我
柔頤即爾澄心義隆自古好邈在今 其三
大人有祚興雲自天之子于升亦躍于淵景曳
清霄響發鳴弦義問弘集淑風載鮮 其四
企予朔都非子孰念豈無弱翰才不克瞻惠音
聿來瓊華玉艷無德不報念辭惟忝 其五

荅吳王上將顧處微

邈矣大昧造化明明物以曲全人以直生類聚
百族群分萬形貞淵挺隨方川吐瓊 其一
藹藹洪族天祿攸蕃神綏厥本道裕其源條有

豐葉波無輟瀾烈風時播芳響世繁 其二

曰繁曰熙載德于茲克文克敏乃惠乃慈遵彼

洪流薄言詠之好是神契聊與之期 其三

仁勇同宅文武相紛王謂御事誰撫上軍於時

翻飛虎嘯江濱式遏不虞俾也無塵 其四

三代既遠直道垂音非齒焉尚非德孰欽鑽仰

自古鮮曰在今匪唯形交殷薦其心 其五

心以殷薦分以道成祗服惠顧疇此深清亦有

芳訊薄載其誠豈無春暉茲焉可榮 其六

大道易聞崇軌難襲孰云匪衍咎吝尤集敢謝

不佞栖山自戢臨篇焉愧德輶辭輯 其七
翩彼日月逝猶駭電朝華未厭夕風已扇詩亦
有悲無幾相見懷德歎心于焉東眷 其八
平津晚貢貢公後徵陟彼玉階黃髮來升靈卉
三秀芳草秋興唯願清神福祿是膺 其九

贈鄱陽府君張仲膺

神林何有竒華妙寶皇朝如何窮文極質斌斌
君子升堂入室太上有曜子誕其輝知機日難
子達其微入輔幃幄出御千里滔滔江漢南國
之紀 其一

謁帝東堂剖符南征天子命我車服以榮何以
潤之德被蒼生何以濟之威振群城却愚以化
崇賢以仁鳳舒其翻龍濯其鱗憶彼荒藪莫敢
不賓雖云舊邦其命惟新 其二

卞和南金終始一色顯允君子窮達一德弘仁
厲道物究其極古賢受爵循墻虎恭今哲居貴
履盈如冲接新以化愛舊以豐隆此嚶鳴悖彼
谷風 其三

忠至寵加孝至榮集內崇南芬外清名邑焯焯
棠棣復增其華猗猗桑梓厥耀孔多被繡畫行

昔人攸羨階雲飛藻軌與同粲 其四
人道伊何難合易離會如升峻別如順淇嗟我
懷人曷云其來貢言執手涕既墮之 其五

孫顯世贈

五龍戢號雲鳥纂紀淳化既離義風肅始軒冕
垂容文教乃理奕奕英族盛德豐祀 其一
於赫皇吳應天統元蒸文烈公光讚懿勲九命
重輝恭德彌勤華黻襲藻金石載振 其二
淵哉陸生本顯洪胄亦崇懿風邈比弘裕無兢
惟德豐光伊茂文以義好施以仁富 其三

山積惟峻道隆名遐潛景淵龍躍承華既升爾
儀誰不允嘉有淮重深載清其波 其四
濟濟皇朝峨峨髦士序爵以賢惟俊萃止翩翩
二官令問不已乃遷華閣皇典斯紀 其五
思文大謨恢我王猷清風肆穆雅憲允休邁彼
江川邈此北流微言蘭馥玉藻雲浮 其六
遭時之險虎宰滔天憑德羨重繫此俊賢休否
既亨名以德淵清微伊鑠鑽之彌堅 其七
明明大象玄鑒照微顯允君子求福不回善挹
引慶險以德祈澄濁以靜岡久不暉 其八

釋彼遊寄樂此窈貞形以神和思以道新清雲
方乘芳餌可捐達觀在一萬物自賓 其九

重門誰和子音瞻彼晨風思託茂林 其十

答

邈矣上祖垂休萬葉廣問弘被崇軌峻躡高山
克荒大川剌涉繁藹惟祐風連雲接 其一

大人有作二后利見九功敷奏七德殷薦鼎寶
重芳勞烈再扇奕世弘道天祿來宴 其二

道弘振古祚未替今如彼在川亦有浮沉大韶
既素響非我音豈曰荒止塗弗克尋 其三

昌風改物豐水易瀾百川總紀四海合源在彼

焉取聿來莫觀曾是徧心敢忘丘園 其四

負暉偏照玄澤謬盈發彼承華頓此增城記景
靈雲倦遊紫庭匪曰能知寔忝長嬰 其五

煥矣金虎襲我皇猷孰云匪吝仰媿蒼流往蹇
來反弭迹一丘變彼東朝言即爾謀 其六

振振孫子洪族之紀志擬龍潛德配麟趾引服
朗節克明峻軌遵彼中臯於穆不已 其七

於穆不已大都是階之子于命民應如隕厚德
時邁協風允諧惠此海湄俾也可懷 其八

乃眷丘林樂哉河曲解紱披褐投即懷玉遺情
春臺託蔭寒木言念伊人溫其在谷 其九
道俟人行辭以義輯和容過表余未云執惠音
弘播清風駿集懷德形懽臨篇景立 其十

失題二首

美哉良友稟德坤靈明照遠鑒幽微研精超跡
皇英質如瑤瓊贈我翰林示我丹誠道同契合
體異心并自頃西徂合于五樓遲想歡嫌觀我
良疇亦既至止願言莫由室邇入蒿中情則憂
抱恨東遊神往形留何以合忍寄之此詩何以

寫思託之斯辭我心愛矣歌以贈之無秘爾音
不我是貽有美人人芳問芬葩嗟我欽羨夢想
光華亦既至思上下欣嘉德馥秋蘭容茂春羅
淑似令姊惟予陋何雖有良友朽木難加愛樂
朋規贈以斯歌皆能載之其美孔多嗟痛薄祐
並罹哀苦堂構既崩過庭莫覩我悻西隣子况
東土契闊艱辛誰與晤語身滯情往神逝影處
發夢宵寐以慰延佇

陸士龍文集卷第四

晉清河內史陸雲士龍

詩

荅兄平原二首 爲顧彥先贈婦四首

荅張士然一首 芙蓉一首

嘯一首

荅兄平原二首

悠悠塗可極別促怨會長銜思戀行邁興言在
臨觴南津有絕濟北渚無河梁神往同逝感形
留悲參商衡軌若殊迹牽牛非服箱

行矣怨路長怒焉傷別促指途悲有餘臨觴歡
不足我若西流水子如東峙嶽慷慨逝言感徘徊
居情育安行携手俱契闊成腓服

爲顧彥先贈婦四首

我在三川陽子居五湖陰山海一何曠譬彼飛
與沉目想清慧姿耳存淑媚音獨寐多遠念寤
言撫空衿彼美同懷子非爾誰爲心

悠悠君行邁筑筑妾獨止山河安可踰永路隔
萬里京室多妖冶粲粲都人子雅步擢纖腰巧
笑發皓齒佳麗良可美衰賤焉足紀遠蒙眷顧

言銜恩非望始翩翩飛蓬止郁郁寒水縈遊止
固殊性浮沉豈一情隆愛結在昔信誓貫三靈
秉心金石固豈從時俗傾美日逝不顧纖腰徒
盈盈何用結中欸仰指北辰星浮海難爲水游
林難爲觀容色貴及時朝華忘日晏皎皎彼姝
子灼灼懷春粲西城善雅舞總章饒清彈鳴簧
發丹唇朱絃繞素腕輕裾猶電揮雙袂如霧散
華容溢藻幄哀音入雲漢知音世所希非君誰
能讚棄置北辰星問此玄龍煥時暮復何言華
落理必賤

陸士龍集卷四
答張士然一首

行邁越長川飄飄冒風塵通波激江渚悲風薄
丘榛脩路無窮迹井邑自相循百城各異俗千
室非良隣歡舊難假合風土豈虛親感念桑梓
域髮髯眼中人靡靡日夜遠眷眷懷苦辛

美藻

綠房含青實金條懸白璆俯仰隨風傾燁燁照
清流

嘯

逍遙近南畔長嘯作悲歎

陸士龍文集卷第四

陸士龍文集卷第五

晉清河內史陸雲士龍

吳故丞相陸公誄

晉故散騎常侍陸府君誄

晉故豫章內史夏府君誄

吳故丞相陸公誄

惟赤烏八年二月粵乙卯吳故使持節郢州牧
左都護丞相江陵郡侯陸公薨嗚呼哀哉皇朝
迭紹成命昊天聖王作矣世有哲臣觀監在吳
乃降斯神思皇我后應運對揚穎秀崇華景逸

扶桑龍輝襲極鳳鳴玉堂舉旗清阻奮鉞夷荒
悠結沉維峻極公綱將撫遠績括地九圍皇淳
爽泰昊旻疾威生民如何哲人其頽登靈在天
遺音播徽敢揚元勲表之素旂乃作誄曰

濬哲我祖時文峻德玄粹納真清休載式本承
慶輝駿惠罔極申錫多祜本支千億芳條遠蔭
靈根茂植根條伊何苗黃裔舜長發有祥貽我
祚晉神明之緒實蕃瑰雋和音嗣世不替碩彥
明鑒在下降命上玄我公初載天謁之純重光
納照旋璣授銓仰儀喬嶽俯濯洪川清輝秀穎

雲翹映晨聲彼岐嶷允迪天真先心則智率意
斯仁秉夷清昧體靈協神神休載鑠九德兼和
挹揮茂朴豐淳鎮華景峻凌高玄源踴波造辰
竦隆彌海廓遐光備既淳逸軌爰超閔罔苞荒
景靈渥耀山林嶽秀天光乃照窮化機神探頤
衆妙駭塵氛埃澄響清肖恢淵博量騰嶮峻邵
振綱宇表登軌絕蹈厥初藏器栖蟠海嶽披藻
崑崙濯秀暘谷况輝熙茂清塵熠鑠含章在淵
發揮龍躍時復陽九承乾之衰有皇于井玉軒
徘徊爰茲赫奕需期雲飛天步皇輿載見太微

華堂誕基委蛇自階鼎輝既濟嘉命乃集和美
未[■]宰物下邑康年委登惠風時協在斷無頗
于教斯輯金虎覲精戎車孔肆神寶播越天人
釋位有命在茲帝思元帥委弁搃干振翼虎噬
威靈既授六軍有序乃誓我衆乃整我旅神干
山立雄旗雷懸旌汜陽即戎江滸我后日敬上
帝臨予靖端夙夜匪寧匪處經始綿綿滂沱惟
海乃幹中軍入作內輔公侯陟降在帝左右關
羽滔天作雲西土帝曰將軍整爾熊虎赫赫明
明皇輿出祖龍舟照淵燿旒映野鋪敦江濱仍

執醜虜荆南既集方嶮未夷天子命我撫之西
垂公侯戾止威神緝熙虔劉作虐思輯子來妖
於止靡奪爾雄旗曠彼羣蠻祁祁遺黎柔遠能
和薄言綏之方塙肅清烈文雋武舍爵明堂冊
勲天府天子曰咨我圖乃功錫爾青土建侯于
東開國名墟光宅海邦分圭作寶軒輅以庸既
受帝祐公用如大四鐵孔阜元戎杳藹淑旂飛
藻綏章丞蓋振我輝靈四方于邁劉王負嶮寇
我西隣公侯赫怒干戈啓陳金鉞鏡日雲旗絳
天凌岡襄嶽沉維括淵元王隕難鯨鯢墜鱗戎

漢時殪方域清塵曹休東踰我疆斯越帝簡厥
佐將命其傑乃俾我公啓行警伐江漢之許
恭授鉞揖帝整旅隱爾霆發栢栢神誅震驚魏
方我公矯矯虎視元戎截彼醜旅效此武功武
功旣彰天威薄曜靈武震華邊垂清暴振旅凱
入王假有廟假廟伊何本庸寵祚土田陪敦四
牡載路出餞于郊此惟予顧禮嘉嵩高樂和湛
露改容肅至傾蓋寵步輦帶翩紛珍裘阿那區
宇惟寧繁遏帝祉於穆疇咨敷奏多士將庸元
輔相天子僉曰公侯宜有爰止繡裳縹藻衮帶

重紫遂虛上司命公登宰帝曰丞相朕嘉君德
以茲軒冕往踐乃職宣爾歡心維黃協極邦
國若否四方爾式公拜稽首欽翼明聖乃御機
衡仰徽七政祗恪本顯無易惟命巍巍天邑惟
清四門公侯作弼煥炳皇文重輝熾景協風煙
焜百神秩祀兆獻思淳克諧庶尹遂成帝勲時
雍旣濟玉途克廣儀形我度軌物垂象後遐施
歸崇廕惠仰茂德栖音廣問沉響洪範遠迪玄
猷洞深靈澤崇敷天嶮垂陰翰飛樂嶮淵蟠泳
沉澤豐泉丘潤博雲林遭世大過彝倫靡肅壘

暨公侯思維雅俗發憤戎衣未言禮樂被分敦
化荷戈思學體仁長物御風煦國睿鑒擢微玄
輝鏡璞戒危膏梁收後白屋五品時訓民神攸
鑠我有奕文如曜如辰何以崇之匪闡伊人我
有烈武如震如霆何以將之保大豐年思弘景
業熙世登民克壯碩老乘鉞河津祉祚勿引早
世幽神仰慕遺輝寤倅憂殷嗚呼哀哉永惟我
公克明德心紛藹芳和被之惠林公侯沒矣孰
嗣徽音名存體逝德茂形潛民之秉思好是嘔
吟嗚呼哀哉惟帝念功寵命光大考謚典謨宗

榮協泰安宮載考我公于邁輻軒啓塗先驅驚
旆哀風結輿遺思馮蓋舍此休明即彼重藹攀
慕靡及永戀光愛嗚呼哀哉

晉故散騎常侍陸府君誄

惟太康五年夏四月丙申晉故散騎常侍吳郡
陸君卒嗚呼哀哉天降純嘏誕育俊人九
奧德鍾三懿應運繼期顯微闡昧特恢大猷雍
化熙世昊天不吊奄忽零墜嗚呼哀哉朝隕棠
榦邦喪國輝帝欽遺烈士詠清機思經皇心痛
浹民懷揮淚充邑惜慟盈畿敢述洪迹于茲素

旂其辭曰

於穆皇源時惟誕弘權與有媯爰帝暨王徽音
接響丕祚克昌乾鑿南眷誕降我祖顯考尚書
納言帝宇正命惟允銓衡攸序篤生常侍固天
所隆祚以靈粹陶以惠風道協體稟德與性鍾
叡心遠暢淵思遐通瞻言潛覽克哲克耽精遐
奧肆志篇章仰咨遺訓思齊曩蹤擒光丞晦微
言是綱錯綜羣藝精徹豪芒顯允閑姿既明且
緯敦叙汜愛經德紀義契闢邦族是綜是緯博
約以禮陳錫載施雍雍閨闈克諧由仁率禮崇

化色養寧親九族和睦德被宗姻猗猗髦俊祁
祁縉紳鑽仰明範挹道希塵愷悌弘裕惠化是
振潛機密暢靡幽不甄濯以清波權以明鈴旌
善板築刊穢紫辰邦無媯幸靈不牟貞沐浴玄
源風移俗純儀德鄒甸北化泗濱耀畧切輝既
升末融爰莅揚邑作尹名邦密邇帝畿大東小
東宣敷五教啟化以崇徵無墜命興無廢功帝
欽良政民懷穆風粵稽舊章率由典刑考績三
載絀幽陟明超踐皇闈紆組垂纓奕世納言帝
衡以平本崇曩烈堂構克榮征輦屢振干戈未

戢乃秉雄戟徵戎東邑四牡徂征威德以立爰
守會稽青紱既襲帝曰欽哉疇咨羣后改授顯
服屯騎是撫雍容皇甸綜文經武時值大過士
爽其德虔惟常侍高明柔直履水察霜淪心遠
測春存三季形志于色頻願厄運載離咎慝靖
亨思順曹氏匪革投弁釋紱皓恩東嶽遁世無
悶清源是濯馥風彌馨明徽載鑠皇途既闢天
罔誕張運在九五違嶮即康猗歟高懿避風遠
臧帝降大命丘園是揚裸將天邑舒藻舊京僉
曰休哉昭德塞違乃升常伯補闕拾遺振纓紫

極攄光太微奕奕玄冕熠熠貂璫仰耀皇維俯
映明堂輿振鳴鸞體佩琮璜居德彌冲雖休匪
康旣跼君宿未跼鼎辰將陟太階弘載育民皇
靈靡顧大命奄臻厲凶彌留儵忽頽湮嗚呼哀
哉黃河難澄梁木易荒聖賢絕景希世齊光豈
曰徒生實維天綱於鑠常侍本德昭仁俯鏗瑤
響仰綴玉振其在克壯自蹇乘屯鳳翳靈條龍
竄祕泉收逋匿耀洪畧陶緼雖跼嘉運託景風
雲瑰光旣耀靈寶木闡弗慮皇圖銜恨徂遷嗚
呼哀哉江河慕海陸樂山於惟君德齊聖廣淵

羣彥景附漸化濯真蓋以崇嚴函以裕淵西徂
華源負澤慕塵幽萌潛暢滯思賴振六言六行
匪君不肅五有三無匪君不極衡准失平匪君
不直方榮遐邇匪君不式君其永沒民其焉則
結思遺愛惟哀允惻嗚呼哀哉仲尼喪魯孺慕
失聲國僑殞鄭邦無竽笙實惟常侍徽懿克明
恩懷士心信結民情聞者巷泣赴者風征八音
輟響獻酢弗營羽檄翳川輕駕盈庭揮袂雲謁
殞淚雨零嗚呼哀哉伊惟平生龔寵荷輝愷樂
承明桑梓猶哀聿懷震丘言告言歸明德遠燭

慮凶以音雖則榮泰存亡是卹爰築新邑經始
匪日眷懷不虞寧禩斯室王事靡盬皇畿是旋
嗚和吉往曾未浹辰震旆凶歸輝景長泯痛感
皇祇哀普四民嗚呼哀哉穆穆天子昭明有融
乃命三人禮憲是崇賜以歸賻榮以贈終冠蓋
南徂映族輝邦日薄南陸辰次天漢龜筮協貞
靈域載判明器旣庇神道已羨懸象未登明星
有爛軒車微動執紼同贊永棄高廈黃廬是館
寧彼昏昧荒此輝粲幽房長鍵脩夜靡旦翼翼
輕蓋翩翩丹旂龍章舒藻旗旒有輝轡輪轆結

玄駟徘徊人誰弗思靡思匪哀援托心楚投翰
餘悲嗚呼哀哉

晉故豫章內史夏府君誄

惟永寧元年五月二十五日晉故豫章內史夏
府君卒嗚呼哀哉乾鑿育俊崇茲大猷景靈垂
祐黃精協符濯蹤浩素闡志玄流熙光聖代邁
勲九區哀彼造物殂命不均既衰斯美去茲遐
年祁祁摺紳泣涕流連故作斯誄著之不泯其
辭曰

於穆府君遠祖彌光功濟黎獻澤洽八荒披圖

承禪襲化軒唐洪風旣振遐曜休煌越殷自周
紹膺遺祉亮節三恪侯服于祀悠悠訖茲徽烈
不已奕世本弘厥美是紀惟神隆慶篤生府君
玄祐秀朗揮景烜煜誕載豐美俊穎夙繁性與
體和孝友穆融虔茲君親姻族睦崇情廣裛誘
品物虛躬安仁履素接舊以冲澄鑒博映哲思
惟文淪心衆妙洞志靈源探幽判疑沉欲焱分
甄滯群祕義猶一貫崇規邈世體道而盤瞻言
先機蔚藻騰翰處約由厚交順于顏文武未墜
君惟克脩百行殊揆君望斯周栖義初九戢翼

洪條瓊輝四灼景問綢繆在昔我國元首載哲
假寐俟旦思庸俊逸旃檢高麾體亦秩秩儀刑
柳惠庶績惟穆旣穆其績英風彌邵天子有命
曾是在朝頻繁幃幄祗承皇曜神以測幽明以
透照目難識夷觀嶮改蹈譬彼清鑒莫塵其操
五紀迭御載隆載頌南嶽頽鎮陰輝素靈瑾瑜
遷寶投跡上京兆萌未緝皇聖攸嗟韋臨猗氏
接被郇瑕道之以禮育之以和齊俗拯弊民靡
不嘉振我翰音洋鑠諸華明明皇儲睿哲時招
奮厥河澣矯足雲霄俄軒玄闕徽英揚颺光灼

東朝髦士攸希媚茲一人示旣翰飛委蛇華閣
陟降太微納言贊事淵裕徘徊習習和風惟穆
惟宣亦曰武昌厥俗允新我後有命爰授俊臣
君子云顧義在安親秉文共武言撫舊京仰肅
慈顏俯熙典刑移彼滯汗泮宮時營衆否斯濟
飛鴉革聲春翹晞景振鷺在庭高墉未奮遭茲
閔凶頻顛泣血三載以終哀響未欲臺命朝隆
厥命伊何俾守南裔匪曰是屯某託身虛槩巾
車旣脂駕言將逝彝倫惟清路逼其序君之于
遠乃恢斯緒思彼衆逸言尋厥楚暮瞻豐林晨

看淵水濯竒以翹披途導軌彼湘之東地嶮俗
危明德審罰替幽崇儀嚴不式刑仁扶物施威
和咸振澤被遐畿皇道御世與民靡偏改彼惠
政濟此未均思一黔首濯漑義淵揖望皇命脩
翻徊翔循彼江濱乃眷豫章觀風樹政德音允
張洪化既攄禮樂克昌閑非秋厲惠淑春陽廣
命俊乂惟弓與旃丘園靡滯鸞驥憑軒豈方伊
類捉髮躬勤震我聲教邁嚮惟殷君化大揚自
北而南君澤本沃河漢載咸慶輝雲蔭塗潤川
漸將配皇宿登景具瞻昊天不弔乃降茲厲高

祿朱融凶燄中燧寢疾彌留大命隕墜邦家不
紀沉哀結世嗚呼哀哉式玩遺美君實克明懷
光暢幽晞髮結清體德秉真審行居貞屈曳蹈
機與世靡矜天命棐謀唯仁則延任道委分亮
曰斯然孰云府君不聞其言永懷載念憂心孔
艱曰兄曰弟篤愛纏綿晞光繼軌參融鴻振今
君何之背世遐湮同生拊膺號哀瘁身眇眇孤
微過庭曷遵天何忍斯于何之臻自君初邁旣
夷且榮今君反矣素旗垂銘雖光百辟託畧玄
靈民慟于顯神孤于冥物從人感轅馬失征飄

風悼響潛魚仰驚豐霄蹶蔭衆羽徊嗚嗚呼哀
哉瞻彼日月歲聿云夕寒暑窮化四辰文錯日
考三從案轡長薄藹矣轎軒脫駕窀穸背榮孤
世寧神大漢丘陵竦廕閔闔寥窅寤標惟哀心
摧涕激嗚呼哀哉咨予與君恩親之微蒙恤于
昔投纓瀾猗思周弱志永庇惠輝如何府君昭
景長違願言詠眷載傷載悲昔我經年逝彼川
路進闕初奔退違陵墓仰瞻靈丘俯增永慕惻
剝肝懷哀其曷厝嗚呼哀哉

陸士龍文集卷第五

